

Dinamichis de feconditât in provincie di Udin*

ALESSIO FORNASIN**, LAURA RIZZI***

Ristret. Daspò tredis agns de ricercje *Venus* su la diminuzion de feconditât in diferents contescj gjeografics nazionâi, cun cheste analisi si vûl tornâ a cjapâ in man il studi des dinamichis spazials e temporâls des principâls misuris demografichis tal contest de provincie di Udin. Cjalant cun atenzion l'andament dal tas di feconditât e de etât medie al part tai ultins 40 agns, ancje diferenziât su la fonde de citadinance des feminis, intun cu la osservazion dal tas di increment de popolazion 2012-17 e dal tas di natalitât 2016, a puartin, magari cussì no, a no confermâ la riprese de feconditât che e jere risultade in chês volte. Il sburt iniziâl, dât dal contribût de popolazion foreste al pâr scancelâsi vie pal timp insiem a un câl plui marcjât de feconditât pes feminis forestis. No cate la eterogeneitât dal tas di increment par an de popolazion sul teritori provinciâl, a pro dai comuns plui popolâts, la feconditât e mostre un câl avonde omogeni a nivel teritoriâl e che al somearès confermât tes prospetivis.

Peraulis clâf. Tas di feconditât, etât al part, dinamichis spazials e temporâls dal salt naturâl.

1. Introduzion. Tal 2004 a son stâts publicâts i risultâts di une indagjin su la feconditât te provincie di Udin (Breschi, Fornasin 2004). La publicazion e voleve jessi une sintesi di un projet plui grant fat a nivel

* Chest lavôr si insuaze tal projet "Cantiere Friuli" de Universitât di Udin e al rapresente il prin contribût de "Officina Demografia e Territorio", coordinade di Alessio Fornasin, Andrea Guaran e Gian Pietro Zaccomer.

** Dipartiment di Siencis Economichis e Statistichis. Universitât dal Friûl. Udin. Italie.
E-mail: alessio.fornasin@uniud.it.

*** Dipartiment di Siencis Economichis e Statistichis. Universitât dal Friûl. Udin. Italie.
E-mail: laura.rizzi@uniud.it.

nazionâl par studiâ il câl de feconditât tal nestri paîs (Breschi, Livi Bacci 2003; *La bassa fecondità* 2004; Ongaro 2006). A chest progjet, clamât *Venus*, a parteciparin diviersis universitâts. I grups di studiôs di ognidune des sedis cjapadis dentri a organizarin une racuelte des informazions necessariis pal studi tal ambit des citâts sedis di ateneu. Dome a Udin si rivâ a slargjâ la indagjin a cuasi dut il teritori provinciâl. La operazion no jere par nuie facile. Lis informazions, di fat, a jerin cjapadis sù midiant un cuistionari compilât dai gjenitôrs dai fruts che a jerin tes classis tiercis des scuelis secundariis di prin grât. Par rivâ, e in chest câs, ancje par superâ i obietîfs de indagjin, al fo fondamentâl il jutori de Provincie di Udin. Nol fo un câs. Il President in chês volte al jere il Professôr Marzi Strassolt, che fin a doi agns prime al jere stât ancje Retôr de Universitât dal Friûl. Tra i siei tancj interes, ancje la Demografie e veve un puest no di pôc. No par nuie, di fat, al jere stât un grant sostignidôr dal insegnament di cheste discipline te Facoltât di Economie dal ateneu furlan. Daspò di jessi jentrât in politiche, il so interès pe demografie al diventà no dome leât al mont academic, ma une esigjence di cognossince che e podeve jessi doprade par met in vore azions concretis di guvier.

Vuê, a distance di tredis agns de fin di chês experience, o volìn tornâ a fâ il pont su la feconditât in provincie di Udin. Si ben che il timp passât di in chês volte nol sedi tant, almancul in tiermins demografics, il contest sociâl e economic dal Friûl al è cambiât une vore. Al è clâr che no podìn vè i dâts di chês indagjin te stesse misure e tal stes detai e duncje o proponìn une leture dal percors de feconditât te nestre provincie midiant i dâts agregâts dal ISTAT. Chest lavôr, dut câs, al vûl rapresentâ la prime di une schirie di indagjins su la realtât demografiche de provincie di Udin e dai teritoris dongje.

2. La feconditât in provincie di Udin dal 1977 al 2015. Te seconde metât dal Nûfcent, ducj i paîs disvilupâts a àn vût un câl fuart de feconditât. Sul plan “contabil”, un dai risultâts di cheste disese al è stât il prevalê, in forme strutturâl, dal numar des muarts su chel des nassitis. Al puest di un quadri plui che secolâr, dulà che i nassûts a jerin simpri stâts plui dai muarts, a ‘nd è vignût fûr un altri, contrari, dulà che la mortalitât e je plui alte de natalitât (Van de Kaa 1987).



Figure 1. TFT e età medie al part in provincie di Udin (1975-2015). (Fonts: www.demostat.it).

Chest procès al ven fûr, intun prin moment, dal câl dal numar di fîs dopo dal secont, o ben i tierçs, i cuarts, e v.i., e po dal aument de età medie des maris al prin fi. Duncje lis feminis a àn scomençât prime a vê mancûl fîs, e po a fâju simpri plui indevant cu la età.

In chest percors “comun” a tancj paîs occidentâi si marchin dut câs diferencis impuartantis tai risultâts finâi. In particolâr, par chel che al inten il contest talian, la nestre provincie si caraterizave, inmò 25 agns indaûr, pe sô posizion estreme, dulà che il numar medi di fîs par femine e età medie al part a jerin, rispetivementri, tra i plui bas e i plui alts di dut il paîs. La Figure 1 e mostre il percors dal numar medi di fîs par ogni femine, o tas di feconditât totâl (TFT), e de età medie al part in provincie di Udin dal 1975 fint a vuê. La linie verticâl che e divît il grafic in corispondence dal 2003 e mostre il disvilup de feconditât cussì cemût che si è evolût daspò de indagjin *Venus*.

La prime part dal grafic e mostre il câl de feconditât dae seconde metât dai agns Setante fin a rivâ al so nivel minim, cirche a metât dai agns Novante. La part di mieç nus mostre la sô lungje riprese. Dopo de realizazion de indagjin *Venus*, cheste fase e je lade indevant inmò par cualchi an. Di nivei di pôc superiôrs ae unitât, la feconditât e je rivade fin cuasi a 1,35 fîs par femine tal 2010 e po, di gnûf, tal 2012 il valôr plui alt di 30 agns fint cumò. Impen, par chel che al inten la etât medie al part, il percors al è compagn di chel de feconditât e, in efiets, i doi fenomens a son leâts un cun chel altri. Sul imprin, duncje, la etât dal part e je aumentade. Dai 27 agns cirche dai agns Setante e je rivade ai 30 al inizi dal ultin deceni dal secul fin a superâ i 31 dongje de indagjin *Venus*. Daspò, si ben che il TFT al cressès, la etât medie al part e je restade stabile inmò par cetancj agns, par tornâ a cressi, ançe se ben planc, dal 2009.

L'alçâsi dai nivei di feconditât a partî da la metât dai agns Novante si à par vie dal increment des nassitis des maris forestis e pe siele, simpri plui difondude, di rimandâ la maternitât di bande des gjenerazions di feminis nassudis tra la seconde metât dai agns Sessante e i prins agns Setante. L'aument, duncje, al è causât in maniere indirete dal lâ indevant cu la etât medie al matrimoni e duncje di chê dal part (Bongaarts, Feeney 1998). Duncje il rûl de imigrazion e il cambiament dal compuartament riprodutîf insiem a àn permetût il recupar des nassitis mostrant une fase di sestament de feconditât (Tillati et al. 2010). O rivin cussì ai disvilups dai ultins agns, dulà che si torne a proponi l'andament costant che lis dôs seriis a vevin te prime part dal grafic: la feconditât e cale, impen la etât al part e continue a cressi.

Cui dâts dal ISTAT al è pussibil fâ un confront tra la evoluzion dai tas di feconditât e de etât medie al part fasint une distinzion tra citadinis talianis e chês forestis (Figure 2). I percors temporâi di chestis dôs variabilis a son segnâts dal 2002 al 2015, o ben tal arc temporâl dulà che a son disponibilis lis informazions ançe par chestis ultimis variabilis.

La etât medie al part e il tas di feconditât totâl des feminis talianis a son rispetivementri une vore superiôrs e une vore inferiôrs dai stes indicadôrs riferîts a lis feminis forestis. L'andament tal timp de etât medie al part al è in cressite par dutis dôs lis componentis. Pes forestis cheste cressite no si pues dî continue, e chest al pues dipendi dal fat che i dâts




Figure 2. TFR e etât medie al part des feminis cun citadinance taliane e foreste. Provincie di Udin (2002-2015). (Fonts: www.demo.istat.it).

si riferissin a un grop di feminis plui piçul. Al è però ancje pussibil che cheste incertece e vegni dal diferent cumbinâsi dai flus in jentrade e in jessude di chestis feminis dal teritori de provincie, e ancje de dinamiche des acuisizions de citadinance (Fornasin 2015). Par chel che al inten il tas di feconditât totâl o viodìn une piçule cressite di chel des feminis talianis fin al 2009, che po al reste avonde stabil. In diminuzion sensibil, invezit, chel des forestis. Chest ultin tas dal 2013 al è lâf jù fintremai sot dal soiâr di sostituzion. Tal avignî, duncje, ancje la componente di popolazion di origjin foreste, par chel che al inten il salt naturâl, e somee destinade a calâ. Un dai efjets di chestis diferentis dinamicis al è il svinçinâsi dai compuartaments demografics tra feminis talianis e forestis. Tai prins agns 2000 la difference di etât al part tra lis dôs componentis e jere di cirche 5 agns, vuê si è sbassade sot i 4. Une dinamiche simile si viôt ancje pe feconditât, cuntune difference che dal 2007 a vuê e je, in sostance, smiezade.

Cui dâts che o vin no podìn deliniâ un *pattern* sigûr di evoluzion de feconditât pal prossim avignî. Dut câs al è dificil pensâ a une riprese in tîmps curts, impen al somee plui facil che e vadi simpri al mancûl. Chest declin al podarà realizâsi midiant une cumbinazion diferente de feconditât di talianis e forestis. No si à di escludi, di fat, che al podedi jessi un aument de feconditât des talianis in face a un câl di chês forestis. Cheste prospetive, però, e podarès jessi il risultât di une contabilitât che e cjape dentri dome la variabile citadinance, o ben l'unic element che o podìn considerâ tes statisticis uficiâls. Di fat, la acuisizion de citadinance taliane di simpri plui feminis forestis, fenomen che al è aumentât tai ultin agns, nol vûl dî un cambiament automatic dai compuartaments feconds des gnovis talianis.

Un altri element che o podìn cjapâ in considerazion sui disvilups de feconditât a son lis sôs carateristicis teritoriâls. Par cheste analisi nus somee miôr dâ une prime indicazion sul indicadôr principâl di evoluzion de popolazion, o ben il tas di increment anuâl, su ducj i comuns de provincie. Par chest calcul o vin considerât i dâts anagrafics al 1 di Zenâr dal 2012 e dal 2017 (Figure 3).

Cemût che si viôt te figure, il tas di increment al à une distribuzion teritoriâl avonde clare. I teritoris che a àn cognossût une cressite de popolazion a son cuasi ducj tal centri de provincie. A son i comuns di Udin e chei dongje. Slontanantsi dal cjâf lûc, il tas di increment di positîf al devente negatîf. Fûr di Udin e dulintor, a àn une tindince a cressi i comuns plui grancj come, par esempi, Codroip e Çarvignan. La diminuzion plui sensibile de popolazion e je tes areis di montagne, soledut tal Cjanâl dal Fier e te Valcjanâl. Ancje la plui part dai comuns de Cjargne a stan pierdint abitants, cussì come i comuns de Sclavanie furlane. Al è clâr che a son ancje des ecezions, par vie di specificitâts locâls. L'unic comun de mont cuntun tas di increment positîf, ancje se di pôc, al è Damâr, zone di vivarose inressite industriâl, impen il nivel di cressite plui alt al è chel dal comun di Lignan.

Partint di chestis considerazions o tachìn cumò a viodi la influence de feconditât su la evoluzion demografiche de provincie. Par chest o vin fat dôs mapis. La prime (Figure 4) e mostre i nivei dal tas di natalitât par ducj i comuns cun riferiment ai dâts dal 2016. L'indiç di natalitât, a part




Figure 3. Tas di increment anuâl (r) de popolazion dai comuns de provincie di Udin (2012-2017). (Fonts: www.demo.istat.it).

il teritori di Udin e dai comuns tor ator che a àn un tas avonde alt, nol mostre une distribuzion gjeografiche clare.

Cheste figure, inmò di plui di chê di prime, e mostre che la basse feconditât no je localizade dome in cualchi aree, ma si distribuîs in ma-




Figure 4. Tas di natalitât (par mil) dai comuns de provincie di Udin (2016).
(Fonts: www.demo.istat.it).

niere avonde “casuâl” sul teritori provinciâl. Al reste un “nucli” di alte feconditât relative tal centri de provincie, ma avonde plui basse di chê che e saltave fûr in relacion al tas. In altris peraulis, la tindince a vê fîs no à une impuartance teritoriâl evidente, aspîet che al è amplificât dai nivei une vore bas di feconditât che si cjatin in dut il teritori.




Figure 5. Tas standardizât di feconditât. Confronts cu la evoluzion provinciâl (2012-2016). (Fonts: nestris elaborazions su dâts Istat. www.demo.istat.it).

3. Conclusions. Ce considerazion podino fâ, duncje, dopo tredis agns de indagjin *Venus*? Tes conclusions di chel lavôr si viodeve che la feconditât in provincie di Udin e dave piçui segnâi di riprese. In chel contest, però, al vignive fûr che il contribût ae feconditât dât des ultimis gjenerazions di imigradis al lave viers une fase di inressite, intant che e jere une ripre-

se de feconditât ancje tes feminis talianis. Tra chestis ultimis, indicazions impuartantis a jerin vignudis fûr ancje cjalant lis feminis che a vignivin de zone urbane e no urbane. Tal cjâf lûc, in particolâr, l’aument de feconditât al jere plui fuart che di altris bandis (Breschi, Fornasin 2002). Vuê nol è plui cussì. La feconditât in ambit urban, ancje se un pôc plui alte di chê “rurâl”, no je tant diferente di chê provinciâl viodude tal so complès, e chest ancje se e je une fuarte presince di feminis forestis tal cjâf lûc. Come che o vin viodût, però, tra lis forestis che za a vivin te nestre provincie il câl de feconditât, almancul tai ultins agns, al è stât plui fuart che tra lis feminis talianis. Se cheste tindince, ipotesî avonde verisimile, e ves di durâ tal timp, almancul pal prossim avignî, o contarìn no dome un numar di nassûts plui bas di chel za bas dai ultins agns – aspîet avonde sigûr derivât de diminuzion dal numar di feminis in etât feconde – ma o viodarìn ancjemò une altre diminuzion di feconditât, o ben il declîn gjenêrâl de disposizion a vê fîs des feminis che a vivin te provincie di Udin.